

Semua negeri bersatu, urus hutan

Pengurusan secara berkekalan jadi agenda utama kerajaan

Oleh Zanariah Abd Mutalib
zanariah_mutalib@bh.com.my

Kuala Lumpur: Dasar Perhutanan Malaysia yang dilancarkan semalam menyaksikan penyatuan julung kali semua negeri di Malaysia dalam bidang pengurusan perhutanan negara yang sudah menjangkau usia 120 tahun.

Perdana Menteri, Tan Sri Muhyiddin Yassin, berkata dasar itu diterima semua negeri ketika mesyuarat Majlis Tanah Negara (MTN) Ke-78 pada 29 Januari lalu, menggariskan hala tuju jelas sektor perhutanan dalam mendepani cabaran baharu peringkat domestik dan antarabangsa.

Dasar itu adalah bukti usaha dan komitmen bersama antara Kerajaan Persekutuan dan negeri ke arah mencapai pembangunan mapan dan pengurusan hutan secara berkekalan di negara ini.

“Saya ingin merakamkan ucapan tahniah kepada semua kerajaan negeri yang bersungguh-sungguh melalui proses perundingan yang panjang sehingga terhasil Dasar Perhutanan Malaysia yang inklusif dengan mengambil kira kepentingan Semenanjung, Sabah dan Sarawak.

“Saya ingin tekankan bahawa Dasar Perhutanan Malaysia ini adalah dasar kita bersama. Kita semua harus bertindak dan memainkan peranan lebih aktif sebagai ejen konservasi dan penggerak pembangunan sosioekonomi negara.

“Saya berharap agar usaha bersama Kerajaan Persekutuan dan kerajaan negeri dalam melaksanakan kelima-lima objektif Dasar Perhutanan Malaysia akan terus padu bagi mencapai sasaran yang dihasratkan,” katanya.



Muhyiddin bersama Shamsul Anuar menyiram pokok resak pada majlis pelancaran Dasar Perhutanan Malaysia di FRIM, Kepong, semalam. (Foto BERNAMA)

Beliau berkata demikian ketika melancarkan Dasar Perhutanan Malaysia sempena Sambutan Hari Hutan Antarabangsa 2021 peringkat kebangsaan di Institut Penyelidikan Perhutanan Malaysia (FRIM), Kepong.

Yang turut hadir, Menteri Tenaga dan Sumber Asli, Datuk Seri Dr Shamsul Anuar Nasarah. Majlis itu turut disaksikan Menteri Besar dan Ketua Menteri semua negeri secara dalam talian.

Perdana Menteri berkata, Malaysia mempunyai 55.3 peratus atau 18.27 juta hektar kawasan berhutan dan litupan pokok merangkumi 43.6 peratus di Semenanjung, 64.5 peratus di Sabah dan 62.3 peratus di Sarawak yang mana peratusan itu lebih tinggi daripada kebanyakan negara Eropah termasuk Perancis, Jerman, Itali dan United Kingdom.

Daripada keseluruhan kawasan berhutan itu katanya, hanya 1.7 peratus adalah kawasan hutan te-

rosot, namun kerajaan amat serius dalam pengurusan hutan secara bertanggungjawab dan berkekalan dalam melaksanakan program pemulihan.

“Sejak 2016, seluas 1,859 hektar kawasan terosot sudah dipulihkan dengan peruntukan sebanyak RM152.82 juta dan pada tahun ini, Kerajaan Persekutuan menyediakan peruntukan RM34.5 juta untuk kerja pemulihan hutan terosot di seluruh negara.

“Saya menyeru kerajaan negeri melipatgandakan usaha untuk memulihkan kawasan hutan terosot melalui penyelesaian berasaskan alam semula jadi, terutama dalam Kawasan Sensitif Alam Sekitar,” katanya.

Perdana Menteri mengakui, kos bagi mengekal dan memelihara kawasan hutan di Malaysia amat besar iaitu dianggarkan RM6 bilion, justeru pelbagai instrumen kewangan khusus diwujudkan Kerajaan Persekutuan, termasuk

Ecological Fiscal Transfer for Biodiversity Conservation, Tabung Amanah Konservasi Sumber Asli Nasional dan Tabung Amanah Kumpulan Wang Pembangunan Hutan di bawah kerajaan negeri di Semenanjung.

Namun, katanya, instrumen itu belum mencukupi dan untuk itu, Jemaah Menteri pada tahun lalu bersetuju meluluskan penubuhan Dana Hutan Malaysia (MFF) iaitu entiti yang akan menguruskan mekanisme Pengurangan Emisi Penyahhutan dan Degradasi Hutan serta Peranan Pemuliharaan, Pengurusan Hutan yang Lestari dan Peningkatan Stok Karbon Hutan di Negara Membangun (REDD Plus).

“Saya yakin usaha yang akan dilaksanakan MFF akan membuka peluang kepada badan korporat, pihak swasta dan institusi kewangan untuk terbabit sebagai rakan strategik dalam aktiviti pemeliharaan hutan melalui instru-

men pensijilan karbon iaitu Sijil Pemeliharaan Hutan (FCC) dan Pengurangan Karbon Penyerapan Karbon oleh Hutan (FCO).

“MFF dijangka membawa masuk dana AS\$100 juta dalam tempoh tujuh tahun akan datang, seterusnya akan disalurkan kepada kerajaan negeri khusus untuk usaha pemeliharaan, termasuk perhutanan sosial yang akan dapat meningkatkan taraf sosioekonomi Orang Asli/Orang Asal dan komuniti setempat,” katanya.

Pada masa sama, Perdana Menteri turut meminta kerajaan negeri meningkatkan usahaewartan dan mengekalkan kawasan berhutan, terutama kawasan koridor ekologi Central Forest Spine (CFS) dan Heart of Borneo (HoB).

Katanya, Rancangan Fizikal Negara Keempat (RFN4) yang sedang dimuktamadkan turut memberi penekanan kepada CFS bagi menjamin kesinambungan landskap hutan menerusi penubuhan koridor ekologi baharu, selain mengurangkan konflik manusia dan hidupan liar serta membolehkan pergerakan bebas hidupan liar terutama spesies ikonik negara yang diancam kepupusan.

“Jika tindakan luar biasa tidak dilakukan sekarang, negara pasti akan kehilangan spesies ikonik, terutama harimau Malaya.

“Justeru, saya menyeru kerajaan negeri mengambil tindakan untuk mewartakan kawasan habitat harimau Malaya sebagai Hutan Simpanan Kekal atau Rizab Hidupan Liar,” katanya.

Kerajaan negeri juga perlu mengurangkan kebergantungan kepada aktiviti pengusahasilan hutan dan memperkasakan sektor ekopelancongan.

“Sumber kekayaan baharu daripada hutan perlu terus diterokai dan dimanfaatkan melalui pemantapan aktiviti penyelidikan dan pembangunan (R&D) sektor perhutanan,” katanya.

Pada majlis itu, Perdana Menteri turut menanam pokok resak sebagai acara simbolik pelancaran Dasar Perhutanan Malaysia.